


Memöie
de un figgiu:
regordi
de un vegio zeneise...

TEMPO DE PASQUA, QUARCHE ANNO FA

di Enrico Carbone
“RICE”

Questa volta veuggio parlâ de Pasqua o, me-
gio, do tempo de Pasqua, da Pascion do
Segnô. In primmaveia e giornae s'allungan
anche senza l'oa legale, a quarexima a sta pe finî
comme e prediche inte giese de San Sci, da
Maddaenn-a o de Vigne. Intremmo inta Sette-
mann-a Santa e, ai mae tempi, i Seporti éan
averti a-o doppo disnâ de Zeuggia.


Me sovven che tutte e stradde: Campetto, Ban-
chi, San Luca, Luccoli, a Casann-a éan pinn-e
de gente pe vixità i Seporti e a tradission a voie-
va de vixitane un numero dispari; i ciù devoti
arrivavan a sette o a neuve: de giese a Zena
gh'éa abbondansa.



Ma l'occaxion de sciortî a no l'éa solo religiosa.
E scignoe ne profitavan pe mettîse quarcosa de
neuvo e pe ammiâ e veddrinn-e e i ommi pe am-
miâ e... scignoe.

A-o Sabbo Santo, a mezogiorno desligavan e
campann-e pe annunziâ a resurrexion do Se-
gnô: l'éa d'obbligo e bonn-a usanza bagnâse i
euggi e a faccia, senza sciugâse.

A mattinn-a de Pasqua, doppo a Messa (a-o
Monte o da-o Paddre Santo) se andava a toa. O
menu, in casa mae, o l'éa quello tradissionale:
leitugae pinn-e, çimma, torta pasqualinn-a (de
solito d'articiocca faeta da mae mamà straordi-
nariamente ben), agnello a rosto co-e patate,



formaggi, fruta de stagion e pe finî l'euvo de cic-
colata fondente pe mi (accattou da Decri) e o
“cavagnetto” de pasta doce con due o tre euve
sode a-o posto da colomba, che a no l'existeiva
prima de l'urtima guaera.

Quarche pasticceria a faxeiva di baetin de mar-
zapan, comme i fan a-a giornâ d'ancheu, insem-
me a-i cavagnetti che àn recomensou a fâ.

Ean pittanse faete in abbondansa che saievan e
poievan servî o giorno doppo, a segunda festa de
Pasqua o, ciù precisamente, o Lunedì de l'Angeo
pe andâ in gita a Santo Zeuggio, a San Dexeio,
a Bavai, a-o Monte o a Cianderlin.

Ma chî a questo punto, màe câi amixi giornalisti,
permetteime un'osservassion *lessicale*. Pe dâ notis-
sia da festa doppo Pasqua a ciammae PASQUET-
TA senza rendive conto che coscì a l'é ciammâ l'E-
pifania e a Befana. Dui moddi de dî pe convinsive:
Pasqueta un'oeta pe segnalâ che a luxe da giornâ a
cresce all'incirca de n'oa; l'atro (in italian) o dixe
*Pasqua Befana/ bianca lasagna/ bianca o nera/ pur
che sia distesa*, pe confermâ che e lasagne a Zena
van condie destese e non a-o forno.

Tornemmo in gita o Lunedì de l'Angeo sperando
che o tempo o segge bello e senza vento.

Ma pe no piggiâse un raffreidô, partimmo a
moen scrollando e doppo ese staeti in giera a-a
Madonna do Monte tiemmo sciù pe Cianderlin.

Doppo l'ôtojo incontrammo quello ch'o vende e
reste de nisseue che o convinse mae papà a tia
sciù i numeri inta sacchetta pe vinse a resta:
manco a dilo o a paga o doppio. Pe no ese da
meno me fasso regalâ 'na scigoa, coscì posso dî
d'ese andaeto a Cianderlin pe scigoe.

In scia stradda carrossabile pe-i Camaldoli gh'éa
'n'ostaja e lì se semmo fermae a mangiâ (ben e
spendendo poco). A l'éa l'*Ostaietta in Cianderlin*
cantâ da-o mae omonimo Costanzo Carbone...
«Se dai vedretti s'asbascia un pö o söl/ gh'é un
angoletto lì pe fâ l'amô/ Se ghe ranniccian strei-
ti/ Cattaen, portae i taggiaen!».